

NOS MORTS

Sin fossa da miu amitg Linus Deragisch, Sedrun



Tia fossa ei aunc cuvretga cun tshupials e flurs frestgas. Aunc dumengia vargada hai visitau ella. Cuorta ei Tia veta terrestre stada. Il matg, il pli bi meins digl onn, ha il Scaffider mess Tei en tgina a Tes buns geniturs Maria e Valentin Deragisch-Derungs. Sco il Benjamin dad 11 affons has Ti passentau bials onns d'affonza el miez d'in vicendeivel luvrar d'ina buna famiglia cristiana.

Car Linus,

Ti eis staus miu vischin e bien camerat da scola. Il viadi en scoletta e scola dil vitg havein nus fatg ensemen. Nus vegnevan era buca adina bein perina. Savens vein nus giu meinis differents. Mo adina vein nus puspei anflau la via. Il pli bia essan nus s'entupai tier il survetsch dils buobs, numnadamein tier il ministrar (survir messa). Quei survetsch vein nus prestau biaras gadas ensemen. Miu amitg Linus era in bien bien buob, a tuts survetscheivels, obedeivels, conscienzius ed adina punctuals. Linus era in camerat ch'enquereva adina la pasch. Sia fatscha resplendeva continuadamein in surrir cuntent. Cun fatscha tarlischonta returnava el da siu giug preferiu: il ballapei.

Duront pliras stads ha miu camerat Linus passentau las vacanzas da stad a casa en la scrinaria da siu bab Valentin, ch'il Bab etern ha clamau en tshiel il davos october. Questa stad ha il Linus giu il giavisch da serender ella bassa

per imprendder empau meglier il lungatg tudestg. El veva anflau ina plazza tier gliend buca nunenconuscenta. Damaneivel da Gosau sil plaz militar, a biars enconuscents, (Breitfeld) sesanfla siu revier da lavur. El ha surpriu da pertgirar leu circa 700 nuorsas. El ei fetg cuntents cun sia occupaziun. Mintga dumengia obtegn il Linus viseta da casa. La cara mumma Maria veva era contact telefonic cun siu Benjamin. In tshutet era siu special amitg. Quel purtava il pign pastur di per di dalla pastira en siu claus. Ils 6 da fenadur, igl εμπrem venderdis ed il venderdis dil ss. Cor da Jesus ei il Linus morts nunspetgadamein. Las nuorsas laian en crescher per lur pastur che ha buca duvrau savens il fest. Ton pli gronda ei la tristezia el vitg. La crusch ei pesonta per sia cara mumma e fargliuns. Enteifer 10 meins duas baras en casa. La mort ha priu il bab ed ussa anetgamein pren il Linus comiau da questa val.

In grond pievel ha accumpignau il Linus alla fossa. Tschun spirituals han concelebrau cun il sur frar caputschin, pader Silvio. Tut contristaus ha nies augsegner fatg il riug da bara e detg: «Con bugen fuss jeu Niessegner. Lau pegliass jeu il maun dil Linus e clamass: Neu Linus, leva si e va tier Tia mumma!»

Car Linus! Ti gaudas ussa la veta perpetna. Roga per nus tuts! Il bien Diu vegli consolar Tia cara mumma e tuts Tes cars.

in amitg